

## Thamani ya Nafsi

*Wala si biyyo tu, ila pia twajifurahisha katika Mungu kwa Bwana wetu Yesu Kristo, ambaye kwa yeye sasa tumeupokea huo upatanisho—Warumi 5:11.*

**W**ale ambao hatimaye watakuwa washindi watakuwa na vipindi vya mfidhaiko na majaribu ya kutisha katika maisha yao ya kidini; lakini haiwapasi kupoteza imani yao, kwa kuwa hii ni sehemu ya nidhamu yao katika shule ya Kristo, na ni ya muhimu ili uchafu wote uondolewe kutoka katika maisha yao. Inampasa mtumishi wa Mungu kustahimili kwa ujasiri mashambulizi yote ya adui, dhihaka zake za kutisha na inampasa kushinda vikwazo vyote ambavyo Shetani ataviweka njiani mwake.

Shetani atajaribu kuwakatisha tamaa wafuasi wa Kristo, ili wasiombe wala kusoma Maandiko na atatupa kivuli chake kinachochukiza njiani ili kumficha Yesu asionekane, ili kuufunika mwonekano Wake wa upendo, na wa utukufu wa urithi wa mbinguni. Anafurahia kuwaona watoto wa Mungu wakitembea katika hali ya kujikunyata, wakitetemeka na wakiwa na maumivu, na wakiwa na mashaka yasiyokoma. Anatafuta kuifanya njia yao kuwa ya huzuni kwa kadiri iwezekanavyo; lakini kama ukidumu kutazama juu, na si kutazama chini kwenye matatizo yako, hutazimia njiani, muda si mrefu utaona Yesu akinyoosha mkono ili akusaidie na unachopaswa kufanya ni kumpa mkono wako kwa imani sahili, na kumwacha akuongoze. Inapokuwa na imani, unakuwa na tumaini.

Yesu ni nuru ya ulimwengu, inakupasa kuendesha maisha yako kwa kufuata nyayo za maisha Yake. Utapata msaada wa Kristo utakaokuwezesha kujenga tabia madhubuti, iliyo linganifu, tabia takatifu. Shetani hawezi kuizima nuru inayong'aa kutoka katika tabia kama hiyo. Bwana anayo kazi kwa kila mmoja wetu kufanya. Si mpango Wake kuwa tutegemezwe na mvuto wa sifa za wanadamu au kubembelezwana; anamaanisha kuwa kila roho itasimama katika nguvu ya Mungu. Mungu ametupatia zawadi Yake iliyo bora kuliko zote, yaani Mwana Wake wa pekee, ili kuinua, kuadilisha na kutuwezesha tufae, kwa kutuvisha ukamilifu wa tabia Yake mwenyewe, kwa ajili ya kuishi katika ufalme Wake. Yesu alikuja katika ulimwengu wetu na kuishi maisha ambayo anategemea wafuasi Wake wayaishi...

Mungu amepanga tufanye kazi, si katika namna ya kukata tamaa, bali tukiwa na imani na tumaini kubwa. Tunapochunguza Maandiko, kuangaziwa kutazama unyenyekevu wa ajabu wa Baba katika kumtoa Yesu kwa ulimwengu, ili wote wanaomwamini wasipotee bali wawe na uzima wa milele, inatupasa kufurahia kwa furaha isiyoelezeka na utukufu kamili.

Kila kitu kinachoweza kupatikana kwa njia ya elimu, Mungu amekusudia tukitumie kwa ajili ya kuutangaza ukweli. Inapaswa utauwa wa kweli, ulio hai uakisiwe kutoka katika maisha na tabia, ili msalaba wa Kristo uweze kuinuliwa mbele ya ulimwengu, na thamani ya roho iweze kufunuliwa katika nuru ya msalaba. Akili zetu zinapaswa kufunguliwa ili tuweze kuelewa Maandiko, ili tuweze kupata nguvu ya kiroho kwa kujilisha katika mkate wa mbinguni (Ujumbe kwa Vijana, uk. 63, 64).